

光緒湘潭縣志

湘潭縣志卷第三

事紀第三

漢高帝五年封故衡山王吳芮爲長沙王湘南縣屬長

沙國

按漢書地理志湘南爲長沙國屬縣一統志則謂湘南爲秦縣亦近之證之樂毅下齊七十餘城唯

獨莒卽墨未下而漢以全齊地七十二縣封悼惠王肥其數正同則漢立縣多沿秦舊秦又沿列國也湘南爲秦置似可信而置立之年無可攷故略秦言漢焉

安帝延光四年冬中常侍孫程等迎濟陰王卽皇帝位

論定策功封中常侍黃龍爲湘南侯

後漢書宦者傳

吳廢帝太平二年分長沙西部都尉立衡陽郡

吳志三嗣主傳

治湘南

水經注湘水篇

又置建甯縣

宋書州郡志建甯吳立水經注言晉秦始中立秦始

時長沙郡不為晉宋書州郡志湘西縣湘西吳立

晉明帝太甯二年七月封丹陽尹溫嶠為建甯公建威

將軍趙盾為湘南侯晉書明帝紀

穆帝永和三年封江夏相袁喬為湘西侯晉書穆帝紀

宋文帝元嘉中封南郡王義宣子綜為湘南侯宋書南郡王義

宣衡陽太守何承天徙郡治湘西水經注湘水篇言何承天徙治湘西承天

宋元嘉中為衡陽太守近戴震校水經注改晉湘南太守誤

明帝太始元年追封新蔡主壻何邁為建甯侯以子曼

倩嗣侯宋書后妃傳

四年徙封鍾武男呂安國為湘南男齊書呂安國傳

後廢帝元徽二年湘州刺史王僧虔以巴峽流民多在

湘土表割益陽羅湘西三縣緣江民立湘陰縣宋書州郡志及

王僧虔傳

齊高帝太元二年湘南男呂安國改封湘鄉男湘南縣

廢齊廢湘南不得其年攷呂安國改封而不增邑則實以湘南縣廢故也

廢帝東昏侯永元二年遣安成太守劉希祖破蕭寶融

所選長沙太守於平都移檄湘部於是始興太守王僧

粲應之自號湘州刺史師於建甯未幾散梁書劉坦傳楊公則傳

和帝中興元年封冠軍將軍曹景宗爲湘西侯梁書曹景宗傳

梁武帝天監二年封都官尚書席闡文爲湘西伯梁書席闡

文後分陰山縣立湘潭縣又封鄱陽王恢子退爲湘潭

侯宗室隱爲湘西侯左衛將軍王進之爲建甯公於時

湘潭縣始立

北史蕭退傳陳書程靈洗傳唐書宰相世系表湘潭立在天監中元和郡縣志言如

此其地多不在縣境然得建甯之西鄙爲今縣地

太清三年湘潭侯蕭退爲青冀二州刺史援臺城不及

侯景以詔命遣還鎮尋降東魏

通鑑

元帝承聖元年十二月營州刺史李洪雅自零陵率眾

出空靈灘討賊陸納納遣將吳藏等襲破洪雅退守空

雲城

梁書元帝紀

二年二月李洪雅以空雲城降賊

梁書元帝紀

陳高宗時封江夏王伯義子爲湘潭侯

陳書世祖九王傳

隋高祖開皇元年平陳併衡山湘鄉湘西入衡山廢茶

陵攸水陰山建甯四縣入湘潭

隋書地理志

唐高祖武德四年析衡山置湘鄉縣復置建甯縣屬南

雲州

新唐書地理志

七年州廢

舊唐志

太宗貞觀元年省建甯縣

新唐書地理志

元宗天寶八載改衡山縣爲湘潭移治洛口屬衡州

唐志

憲宗元和初以湘潭縣改屬潭州

新唐書地理志

僖宗廣明元年湘潭饑

舊志

昭宗景福三年正月武岡指揮使蔣勛起兵攻湘潭據

邵州勤後為馬殷將張佖所破

通鑑

五代周世宗顯德元年湘潭饑湖南節度周行逢偽使

人為山賊殺易俗場官鄧洵美於官舍

十國春秋

宋英宗治平中縣人開金礦

清江三孔集

哲宗元祐元年分長沙五鄉湘潭二鄉置善化縣

宋史地理

志

徽宗宣和間湘潭大旱

江西通志釋法忠在湘潭遇大旱忠入水呼龍曰業畜當雨一

尺雨隨至

高宗紹興初權知湘潭縣楊宋臣卒於官宋臣有惠政

眾議請卹於朝胡安國以為非宋臣意乃止

胡氏傳家錄

孝宗淳熙間詔潭州重修南嶽廟以湘潭令薛大圭督

役取材於深山

夷堅志

甯宗紹熙元年湖南轉運判官陳傅良定楮州市酒課
初楮州酒課歲嘗至緡錢二十萬遂以配於民爲額傅

良攝州事按舊籍頓減之民得少紓

蔡幼學撰陳傅良行狀

慶元二年湘潭米貴

夷堅志慶元二年湖湘粒米翔貴郊郭間無不艱食湘潭境內有昌

山周回四十里中多篠簜環而居者千室尋常於竹取
給焉或擣爲紙或售其骨或作簾或造鞋其品不一而
不留意耕稼先是乙卯歲連山之竹皆開花花謝而結
實如麥粒而長人以長篙擊竹杪取治之如稻穀每一
石得米五斗或四斗其炊法和以粳米十之一沃以湯
其香全與粳同民賴以濟至販糶於縣市遠近百里皆
取之穀價爲平

年升

理宗景定三年初置主學

景定中湖南提刑胡穎兼提舉常平卽家置司

宋史胡穎傳

按穎家九龍山附近之石壁口至作來認堂則在衡州史已明言之省志以爲在湘潭境殊誤

恭帝德祐二年元兵陷湘潭縣丞李長庚歿之

一統志

端宗景炎元年

元至元十四年

前贛州通判熊桂進士劉斗元

與衡山張鏜趙璠攸王夢應及陳子全吳希奭等同時

起兵復衡山湘潭攸醴陵諸縣

鄧光薦督府忠義傳

二年

元至元十五年

元行省兵復陷所復諸縣殺熊桂并屠其

家

督府忠義傳

元成宗元貞元年升湘潭縣爲州仍屬潭州路

元史地理志

仁宗延祐二年五月饑

仁宗延祐二年分撥周王和實拉

原作和世刺

沅南州湘潭

州戶六萬五千戶鈔二千六百錠

元史食貨志

十五年夏四月大饑民疫死者無算

文宗至順二年四月詔托果斯

原作脫忽思

娘子繼主明宗

幄殿賜湘潭州民戶四萬為湯沐

元史文宗紀

順帝至正二年詔修南嶽廟以湘潭州同知阿兒思蘭

督役

南嶽志

十一年湘潭兵亂

十二年鄉人推李洙為長率村民八百家以兵自捍洙

稍與爲要約築柵堅守以俟靖亂者尋被衡山茶陵等
寇夾擊被執外之王汝礪趙康亦結鄉兵自衛

明太祖洪武元年指揮同知蔡遷從常遇春追饒鼎臣

下湘潭

明史蔡遷傳

殺漢主所置參政易華於烏石峯下

二年湘潭劉玉湘欵附於潭州指揮嚴廣時陳友諒故
將饒鼎臣以茶陵叛廣討平之

省志

遂屠湘潭招四方之

民以實縣

三年三月降湘潭州爲縣

明史地理志

二十三年大有年

成祖永樂七十大饑

通志

七年九月江西妖賊李法良行彌勒教流入湘潭聚眾
爲亂事聞遣豐城侯發兵勦之法良夜逃至吉水縣縣
民械送京師誅之

江西通志

二十年大有年

世宗嘉靖元年流賊數百人塹山爲砦剽掠村落知縣
高應禎招其渠俾至縣習禮朔望一至及冬更製狶皮
鞞狗皮帽以示旌異時其懈陰布健兒觀鞞帽卽擒殲
之火其砦

六年吉王見浚薨孫定王厚熜嗣請湘潭商稅益邸租

不許

明史吉王傳

十六年知縣韓嘉會以湘潭賦多加派申請減免

二十四年大旱有寇據楓木蛇皮二寨鈔略縣人周環率鄉勇破之

三十六年縣丞劉甯率眾討黃茅驛土寇平之

四十二年縣城爲大水淹毀

神宗萬厯二年巡撫趙賢檄知縣吳仲築湘潭縣城

莊烈帝崇禎十年正月臨武藍山礦寇剽掠湘潭知縣

黃文經集兵禦之以縣人馬惟元爲將王應龍佐之駐

兵錦灣斬首數百賊卻還

府志

十年冬臨藍賊訶馬惟元病篤十一月乃與湘鄉天王

寺賊自甯鄉襲湘潭王應龍單騎對壘經旬日惟元力疾出戰外於陣城遂陷應龍奔何騰蛟麾下督師滅賊十五年十二月偏沅巡撫陳睿謨奉惠王常潤自荊州奔湘潭

十六年八月流賊張獻忠兵自衡山至湘潭下澗司寇鈔不問老幼男婦俱斫一手閒有斫兩手者至縣城陷之以典史馮某爲僞令斂兵北渡畱賊簡甲屯湘潭十二月民兵推李參將爲首至湘潭與賊戰敗賊乘勝拔營去李兵藉捉投賊之家爲名捉一人牽連十餘家民

不聊生

湘上癡
脫難錄

順治元年正月有舟師從淶口來李參將拒之敗保城中既而舟師大至登岸殺人縱火參將遜去旋有左良玉別將馬士秀攻城知縣杜岡益遜左兵殺掠十餘日下武昌二月遺民始歸五月始有舟楫往來

四年二月明鎮將盧鼎黃朝宣舉兵相攻朝宣時居燕子窩介潭衡攸醴之間最橫虐嘗剝人皮帖郡門流毒數百里三月恭順王孔有德懷順王耿仲明智順王尙可喜自岳州進兵長沙師次湘潭以順天舉人間安邦知縣事明平南伯黃朝宣奔衡州其黨劉芳保鄭斯愛倚鳳皇山險爲寇有德討平之并斬朝宣及其諸子

五年十一月明潰將馬進忠牛萬材劉體純袁宗第張光翠楊國棟等賊十四家合眾數十萬自武陵桃源來堵肩錫率高必正李赤心躡之蹀血五百里連營甯鄉益陽湘潭二縣間攻長沙長沙堅守退湘潭分屯四十里焚掠三月殺男婦數十萬口其餘外雪中及凍餓者無算唯花石以前副將胡景仁統眾兵不至得全十二月騰蛟與肩錫會湘潭責其驅賊激亂殺百姓大慟騰蛟查放各營所略難民給米令歸皆不欲去甘止湘潭倚騰蛟爲命支茅舍以居

六年正月大兵至湘潭明督師大學士定興侯何騰蛟

外之初明總制堵胤錫與鎮將馬進忠有隙令李赤心
高必正爭進忠所取常德進忠大怒盡驅居民出城焚
廬舍走武岡寶慶守將王進才棄城走他守將皆焚營
潰湖南州縣爲一空赤心等所至見皆空城旋棄走東
趨長沙騰蛟時駐衡州大駭乃令胤錫向江西檄進忠
由益陽出長沙期諸將會軍而親詣忠貞營邀赤心入
衡部下卒六千人懼忠貞營掩襲不肯從惟攜吏卒三
十人行將至聞其軍已東卽尾之至湘潭湘潭空城也
赤心不守而去騰蛟乃入居之大兵知騰蛟入空城遣
將徐勇入勇騰蛟舊部將也率其卒羅拜勸騰蛟降騰

蛟大叱勇遂擁之去幽之城南佛寺中進忠兵聞大兵
猝至驚潰進忠副將楊進喜方理髮聞兵潰大呼曰朝
廷不惜高爵養我輩何爲況吾營迎何公至而忍棄之
乎約髮不及戴兜牟揮刀馳馬出求騰蛟與大兵巷遇
相格鬥手刃數人露額中流矢貫顙外騰蛟不屈殺之
流水橋按長沙亦有流水橋故三藩紀事本末以騰蛟爲外於長沙非也其時馬進忠未外湘上癡脫難錄以爲殺於雲湖亦誤大兵以餘賊未靖下令屠城自二十六日
至二十九日方止罷知縣閻安邦以李璘代之璘募貲
掩鬻骸爲粥以食飢民又條上絕荒簿以求緩徵

九年以明將李定國陷沅州武岡將軍沈永忠自沅州

退保湘潭十一月定遠大將軍敬謹親王尼堪等南征
師次湘潭

十年冬十一月敬謹親王尼堪敗馬進忠於湘潭進忠
走寶慶

十一年知縣劉見龍請復官馬以蘇民困先是民困馬
役流亡不敢歸或數十里無行人自是復養官馬曲卹
民隱招集復業商賈復通

十四年孫可望請降兵至湘潭多索糧糧知縣史宗堯
請盡如約軍雖數過民無擾焉

十五年經略洪承疇駐兵長沙偏沅巡撫袁廓宇至湘

潭

十七年驛道議裁湘潭驛馬八十二匹以濟沅州寶慶二路知縣鄭有成力爭得免

康熙三年裁湘潭儒學訓導知縣鄭有成重建縣城九年十二月偏沅巡撫盧震履災輕行至湘潭

十三年知縣鄭應侯重修縣城叛藩吳三桂兵犯湖南破湘潭設僞官銷西禪寺銅佛像以鑄礮子

十五年二月吳三桂將夏國相等引萍鄉敗兵趣湘潭十一月三桂由湘潭入衡州僭尊號

十七年安親王降僞水師將軍林興珠於湘潭興珠遂

屯湘潭

十八年順承郡王帥師定湘潭知縣張輻取寇糧以供軍食不復取之民民以大安未幾輻竟以乏軍興免是年置湘潭外委千總

十九年知縣張彭以大兵頻過驛馬官養法復廢復沿舊例令隄行里長輪養不勝其弊請以額編帑金清郵政無復橫征勒石著之

二十一年復設湘潭儒學訓導

二十三年知縣姜修仁增修縣城

二十四年長沙游擊苗守疆防守湘潭

二十六年知縣姜修仁罷官去先是滇黔底平

詔免所過州縣積年逋糧湘潭當蠲免者數十萬官吏
征收如故時民控荒田不能征知府任紹曠屬縣征荒
修仁因重刑勒限及後部文到縣人石崙森復上書訴
狀修仁乃得罪

四十一年裁湘潭驛丞惟畱都石驛丞

五十四年巡撫趙申喬劾罷知縣王爰溱

雍正二年增縣學額通前二十名

三年分湘潭縣丞駐朱亭

六年設永甯司巡檢

七年改都石驛丞置黃茅驛丞

八年縣產嘉禾

九年六月饑

十一年知縣衛學瑗自經外於縣署之清風閣

乾隆元年縣民胡維盛妻一產三男

九年裁永甯司巡檢以長沙協右營守備分駐湘潭

十六年饑自十六年冬至十七年夏米價昂貴知縣蘇

陽華募捐設厰發賑

十九年大有年

二十四年裁驛丞設黃茅司巡檢

二十五年知縣秦鏞重修縣城

四十三年夏秋旱知縣募貲以賑

五十四年饑知縣方維祺捐賑

嘉慶元年大有年

六年饑士商呈請捐貲發賑

十三年饑縣人張之澧等呈請捐賑

詔茶陵攸縣醴陵湘潭酃縣安仁衡山七州縣水災分別蠲免緩徵仍加撫卹

二十年知縣張雲敷重修縣城

二十二年大稔

二十三年大有年

二十四年五月江西商民與縣人鬭鬥數日未定院司
委官巡緝始散知縣毛夢蘭坐革職遣戍

道光九年饑

十三年縣試童生以知縣靈秀貌不恭罷試事聞遣侍
郎賽尙阿按其事靈秀坐娶民女爲妾革職遣戍

十五年饑

十七年大有年

十八年大有年

二十四年十四都鄉民陳記明妻黃氏一產二男

二十六年知縣方登賢去官負官錢使縣人葛氏代償不足則取所置私舍入官改爲行臺

二十九年湖北及沅江饑民數萬就食縣境士民捐貲助賑

咸豐二年七月匪寇洪秀全等數千人由茶陵繞道櫛洲犯省城八旬餘乃解縣中戒嚴欽差大臣徐廣縉自廣州度嶺援長沙駐軍縣城軍頗不戢賊解圍趣岳州乃移屯省城

四年三月寇將林紹璋犯湘潭知縣劉建德出城防堵城陷賊縱火焚九總十總及錦鸞等處責民戶財物在

籍侍郎曾國藩遣副將塔齊布率軍從甯鄉繞道馳抵城外高嶺大捷馬坡遂攻城水軍營官千總楊載福附生彭玉麟等焚湘岸賊船同時夾擊賊棄城散走復縣城居民歿於賊者百餘人

五年縣人周煥南等訴改漕折縣自嘉慶後知縣遞有浮收號爲漕折凡有聲氣及諸大猾官吏畏其撓因私餌之成歲例號漕口至是縣人不勝其憤訴之巧猾蠹役竄逐有差積敝清釐正供益饒是年立釐金分局於湘潭各市集緜盛處易俗河三門櫛洲朱亭皆設卡局六年設湘潭鹽茶分局商民請立水師

七年巡撫駱秉章以助餉功奏加湘潭文武學額各十名

八年賊石達開圍寶慶巡撫飭縣團練自衛居民仍多逃徙者

九年知縣孫坦修縣城

十年湘潭立東征局以資江南軍餉

十一年清查積穀常平倉

同治二年商民以釐金局員刻覈過甚罷市三日

三年設督銷鹽局於湘潭

四年巡撫奏併鹽茶局於釐局撤東征局集團練搜捕

土匪

五年五月廿七夜會匪向萌和彭四鐵匠等糾眾千餘焚掠錦鸞團勇斬之先是匪等於各總馬頭皆以大舟置火藥將因城隍神會舉事知縣董宏遠先諭禁賽會及先一日大風覆舟數百火藥皆溺於水謀泄匪遂縱火發難外委千總田生蕙巡緝餘黨數月始靖鄉民以告訐構陷外者亦眾是年秋大熟

八年九月初七日會匪起朱亭縣丞葛治平走踰垣以傷外蔓延淦田暨黃茅驛焚掠以鳳凰山爲盜藪巡撫劉崐遣參將柳萬勝練軍營官于高勝等討之數月盜

眾稍稍自散知縣麻維緒窮治黨與鄉民告訐構陷頗眾又捕繫三門土豪龍化池欲斬之議久不決置獄踰年總督李瀚章至長沙乃釋之

光緒二年重修常平倉廩商民以權稅苛刻紛集局門迺委員勸諭

五年省水師船七號

九年知縣黃教銘以廩生認保互相攻訐通詳褫革數人縣人戶部主事周滋大等訴於都察院轉奏下其事悉反之訓導周宗墜坐免教銘亦假他事鐫級去

十年署巡撫龐際雲劾罷署知縣洪錫綬

十一年五月大水知縣沈錫周募民助賑巡撫奏蠲被災民糧有差先時水陷城西北隅五丈許九月初七夜盜乘之入劫居民傷斃一人盜逸不獲調省城防勇五十名駐縣城或曰錫周嚴法繩差役黠者假此去之果以參限改補已陵是年修學宮萬樓成有五色鳥巢泮池旁桂樹產五雛數月始去

十二年徙建清風閣 行保甲法

湘潭縣志卷第四

山水第四之一

西北山之首曰韶山西界湘鄉東爲書堂山雲湖水出焉東南流七十里入于漣其中多竹蘭石炭

舊云韶氏三女山居學道鳳銜天書至而仙去山上

有鳳音亭其陰有東臺桃花洞

元王文彪詩云瀟湘雲水夢中來猶記蓬萊

進酒杯歌罷遠游人不見玉簫吹月過東臺昔年辛苦讀丹經夢裏瑤臺月自明玉洞桃花今寂寞鳳音亭下竹風生程拜光詩云女郎遺迹寄山隈靈鳳親傳玉札來彩翮已隨仙馭去危亭今向紺園開天長望闊雲蹤遠林密清陰竹影篩坐覽行吟難盡興日斜歸去首頻回張祖銘詩云翠嶺陵香竹香生帶露蘭其下則書堂山與長沙山同名臨湘歐陽信本所

居疑此亦率更別業也雲湖水出山下而東流過連
益橋橋東山行可十里爲羅仙砦東北則甯鄉之地
甯鄉故益陽所分連則連道橋蓋漢縣之疆取二縣
爲名也雲湖水又東稍南流逕高橋有小水出鐵石
坳逕矮橋而入雲湖水高矮相對而名矣又東南得
天子嶺水或云韶山因虞巡得名故此名天子自嶺
東北皆甯鄉地靳水東流而入於湘嶺南則雲湖入
漣二水之間山岡起伏形家以爲縣脈所行也雲湖
水又東南得梅湖水又南得仙女山水下爲小韶山
與韶山相望雲巘參差翠微雙秀其地皆在湘鄉下

四都別有仙女山舊圖謂之仙女峰非此山也山水東流可三十餘里至下雲橋得靈神砦水北有上雲橋跨雲湖水或又皆爲營字云前代團練屯營之地靈神砦水東流七人里徑清溪寺又得一小水交流東注至石壩橋南而入雲湖水南流東折逕師子山上有石盆夏旱不竭洞多蟄燕因謂之燕子洞水屈西南得毬山水山形正圓西連師子山水出永義亭逕翟家山爲白玉泉今縣無翟姓或改爲側又南得巖鷹壩水而屈銀田寺方音皆曰甯田未知誰爲正字自此通舟撥船轉運送租販米日夜往來雲湖船

有二三步銀田靈官及橋上也舟載數十斛才用一人
榜之不須帆楫惟恃一篙無阻風波刻期而赴或霜
清春麗命舫獨游亦臨汎之別趣矣北有小水出楊
坤合蘇坤大坤泉塘三水南流至銀田東而入雲湖
水稍東得高露山水山與楊坤皆甯鄉地也自韶山
東南五十餘里皆依水分界故北邊犬牙侵南二十
里高露亦名山也單椒孤秀二縣所瞻兩水背流北
爲馬陂壩水入靳南爲界田坤水由雲湖入漣雲湖
水又南逕靈官廟水旁市集杭稻所趨良田上腴廣
平煙秀川光瑩映舊多大宅又東左得登龍港水右

得栗山坪水又南屈新橋小市也又東南右得蓮花
壩水又南得杜家塘水又南得白龍坤水而南屈雲
湖橋逕橋下東流橋上列肆置廬爲驛道頓舍之所
潭連商旅水陸津途自靈官廟至雲湖橋並曠敞靡
迤彌望平遠舊爲大湖明嘉靖以來旁皆王氏墾屯
之地天啟時居民見青白二牛門於湖岸連日不解
或夢白衣求助自云龍子今爲青龍所妒欲涸靈源
明日攜火槍擬擊青犢誤中白牛俄頃並沒於湖乃
見青蚪鼓浪潰隄而出自是湖涸成田耕者往往鉏
得龍骨王氏以爲世利至乾隆時家族益隆有中秦

者字退圃獨收買餘蛻沐以香湯斂積經年首尾盈尺乃作銀棺殉以七寶造塔封之號白龍廟退圃饒巧思尤善行水田園池井並激水迸流家作巖亭盛夏飛瀑刻作人犬應機趨吠優游間適老壽而終鄉人云龍塔前恒見老叟陰雨則覘疑白龍更爲人也今宅久易主竹樹猶茂雲湖故陂彷彿可尋引派東流左得白龍坤水卽青龍所決之湫也通派東流得香鑪山水水南流得大牯牛山水入雲湖橋而並東流橋南舊多晏姓有晏家巷今悉爲墟壠旁一樹枝幹正方樹葉青蒼隨方異狀或以爲卽楷木俗謂之

四方樹又云葉似飛蛾亦謂之胡蝶樹明吉藩賜莊
又在其南所謂卅畝無糧野語以爲正德徽行乞食
田婦夫笞捶甚苦詭對云責其慢客故酬婦同於柏
谷得田比於石窳案田中立石刻云湘潭卅九都地
名早禾塘欽賜吉府莊田東至晏文貴田界四至廣
方二三里田畝數萬蓋初封租食之土然以史正俗
是亦所謂口眾我寡不如稗官之解紛矣早禾塘今
名石牛塘方音牛泥同聲悉云石泥退圃父宅憑岡
臨湖六子枝分凡四十八莊七都大宅皆此自出提
督王明山微時游釣及貴遂買此居茶陵譚尙書湘

鄉陳按察亦各得其一宅長沙田業惟此都畝收一

鍾田值亦倍雲湖水引帶宅前逕山塘彎值雲峰山

麓而入於漣

七十餘里

謂之湖江口山上有雲峰菴山外

重岨疊嶂雲天東豁而趨南北塘漣瀕之小市也南

北塘水出譚家坳南右得毛山煙山沙仁三水左得

唐坳煙竹二水又右得涼浸壩水左得樟樹坪逕闕

家橋東折南流入于漣

二十餘里

闕家卽王忠渾妻族之

故居矣漣水又北過姜畬湘驛之大市也爾雅田三

歲曰畬南方以燒田爲畬畬有餘音轉呼爲車姜畬

蓋姜氏墾畬之地田土腴饒舊多富室亦王會沙之

故里坊表尙存市西有水出菱角塘西南逕七里鋪鋪東至市七里西至石井鋪亦七里水屈東北流入于漣漣水稍北逕龍口橋得櫻子嶺水而直東流也韶山東南五十里曰高露山又東二十里曰譚家坳又東稍北十里曰龍安之山是有仙女祠韶氏之所主也又東南二十里曰塔嶺又東南二十里曰湖頭變氏居其東爰有三嶺西臨雲塘其果宜柑西有調塘是爲龍湫旱則雩焉

天子嶺東南有梅坳又南屠家坳坳水東北流入甯鄉南境逕高露之陰東流入靳水從高露東行五里

渡馬陂水出白羊塘北流爲馬陂壩右得古湖水左
得託家山水逕許橋入甯鄉地北流合新埠港水新
埠港出甯鄉蕭塘東流至孫家鋪縣六都西北界有
水出譚家坳西北流注之仍入甯鄉地而入于靳譚
家坳東水自桂芳亭南流逕炭家礪舊志所謂歎嘉
崙壁立于雲者也土音崙龍同聲而炭家無義改爲
歎嘉彌復不詞或又呼譚爲淡疑炭卽譚耳坳水東
南得仙女峰水峰卽龍安山也宋理宗時有老嫗攜
女婦登山得桃如盃食而仙去與韶氏三女事符峰
南有冬桃嶺斯得桃之地矣仙女峰體峭亭亭若出

平地南漣北靳望以知方峰水南流右源交匯可五
六里而合譚坳之水舊以此水逕黃泥舖入漣謂之
黃泥港而云源出峰下今案坳水流遠宜爲正源坳
水又東南逕石家坊石給事之故宅也袁松江藏書
之屋近相連接望廬瞻牖如聞絃誦冬桃嶺左右二
水南流並入凡逕五橋而屈黃泥舖中有褚公橋云
登善所經又逕姚湖東而入于漣三十餘里形家言水斷
地脈故縣治龍行更當北出牛頭黃龍高嶺西風諸
山而入湖頭今依地望但從水次從冬桃嶺山岡東
越至蔡家嶺有小水出嶺南行合白毛塘水逕烏臺

山東舊志云山有石臺屹爲邑鎮東爲佛子山亦曰
福字嶺東有永陂托托者大池小湖之名縣有十二
托並爲水利此其一也陂托意重鄉人不解陂義復
加之耳托水餘波西注嶺水南流入漣十五里謂之桃
花港又東楊家港水出龍安山東左得兩頭塘水右
得豪塘水豪又作蒿今呼侯塘方音侯豪同聲或云
侯氏故居又東得牛頭山水南屈栗塘得黃龍山水
山峰聯互爲縣治主山下有黃龍寺城外有黃龍廟
巷皆指山以爲名亦明黃左都賜葬之塋矣山水南
流屈高塘得鄭家山水高塘李氏族居西連塔嶺李

文莊建塔以埤形勢塔忠武從甯鄉步道援湘潭至此聞城破暫屯營棚偶訪地名喜合己名曰吾必勝矣因進兵遇賊一戰破之遂復縣城軍興大捷實始此戰山寒野秀文莊偶游詩所云鳴榔輶春小溪動碧者也楊家港又南流左得石坳水右得洪陂水屈西南流逕鴨頭鋪而南流入漣

三十餘里

石坳東南曰西

風嶺東南有兆塘羅汝懷以兆爲俗謠正爲調塘塘尾有龍湫歲旱鞭水歌舞祈請因謂之龍霖潭東則雲塘昔蔡氏自太湖來遷移柑傳種歷歲繇滋湘人通以柑爲橘故云雲塘美橘橘乃今橙耳屈子頌其

不遷柑則可移許叔重以橙爲橘屬柚似橙而酢則似以橘爲柑又無柑字而某爲酸果字從木甘文與櫟連正同橘柚今驗柑不可苞許義非也自此陂陀微起爲湖頭三嶺昔變元圃園林技樂自擬東山廣闢陂池通波湘漲故有御史田變家湖嶺地在湖頭纔同一簣蓋當時假山後存基迹故明時王霖罷長沙縣丞亦居於此卽王岱之始遷祖也今霖墓卽在變園矣

又東南二里居于縣城

縣治宋故城也令廡值觀湘門城南門也門臨湘川

廨沿宋制復有清風閣云編題爲張栻書又有桂子亭明嘉靖癸丑冬老桂結子實大味甘風雪嚴寒疊若珠璣縣令陳應信建亭紀瑞或復見青衣女子連袂徘徊李湘洲以爲太山之北桂實如橘青腰玉女三千守之食實者一年仙去此其類也眾以爲妖樹終見伐李家近亭南周東沙家自東門至南分城之半其後伯孔又作帆園則在城東譚友夏爲之詩李氏乃園中有維嶽臺臺卽翔雲殉節之所周宜一亦同時併命其西亭子塘有故第則譚景行遇害之地景行字翼之少年高第

宴禮部簪贈花女詩云宴罷瓊林飛馬去一鞭搖落海棠

花

歸構園池故有宛在亭芙蕖萬本又曰藕花居三

姓名園並爲灰燼雖成仁止水而作鑒高臺禍不虛

來必生驕侈矣陳慈田復於塘東大治二第未及再

世旋復易主恪勤名德不傳輪奐昔張湘門告歸訪

問故家其友歎曰滿日荒涼又問今城中復有新宅

否友曰滿日倉糧時賦斂叢敝戶役溫飽今倉糧亦

復荒涼也西北有宋陳孝子母墓或云孝子病篤雷

震墓裂號泣奔入墓穴旋合斯則徵奇語怪有累純

修今碑題母子二冢以時培護又西南爲西禪寺造

自明初天啟時殿左楹陷土欹傾坐待頽圯寺僧泰

然無力興修但祈佛佑有匠借宿請爲正之運斤周
擊響如霆震及明榱桷悉正瓦壁無損吳三桂毀鐵
佛鑄礮鑪裂鐵飛殺數百人乃更鑄銅佛今像是也
寺後井水泉味香冽南門外湘水中亦有一泉味與
相匹彼泉名眞應揚子第一泉之類也縣廨東復有
三義井大旱不涸云本何氏家井割以濟人按三義
之名里俗以祀蜀將張桓侯屠人公祠蓋因以名若
何氏義井不得云三也東有楚山觀相傳晉代所造
至元末毀於兵火明洪武初詔汰寺觀以其陶公舊
迹奉勅重修旁爲柳師巷柳道人煉丹之所又旁爲

學宮舊址宋李縣丞墓在焉東爲陶園張九鉞故宅也九鉞宦游其妻梁氏購熙春門內桃園奉姑馬氏居之後易桃爲陶所作詩自六十以後題爲陶園集二卷其從孫重刊詩集概以題之陶園名顯外議以爲湖南第一詩家也湘門之第又在井南後有小橋云昔姑婦六人於此仙去浣濯之地謂之洗腳橋蓋明時周六子廬宅雲蔓有類山居故以此謔之也其尾爲壺山踰于湘水

縣城三方隔水壺山自湖頭分支迄于湘岸純爲石體謂之石觜頭亦曰馬蹏石與壺皆狀石形也荊州

記山有巨石狀如壺一統志云在縣東三十里取舊
說据洛口故城言之耳下有石頭寺褚登善題曰唐
興云昔士行駐兵曾作二亭一以望衡一以漁釣因
謂之陶公山湘流衝波礙山回曲下爲錦彎中有大
洲曰楊梅洲楊梅爾雅字作英梅味似梅酸果若花
英洲上不產此樹但饒好茄或云楊梅二姓居此亦
變元圃之別業也壺山半有一亭云陶亭之一後題
黃葉取韋迢詩以名之

韋迢早發湘潭寄杜員外院長詩北風昨夜雨江上早來

涼楚岫千峰碧湘潭一葉黃故人湖外客白首尙爲郎相憶無南雁何時有報章

唐興寺旁

有智儼石塔劉夢得爲銘文云長沙潭西今名石觜

下一潭爲陶公潭舊曰漁潭又下五里有第二潭皆

在湘水中蓋卽所謂長沙潭也

劉禹錫唐興寺智儼大師石塔銘云祝融

靈山禹所治非夫有道不可止中有毗尼出塵土以律視儼猶孫子登壇入師四十紀南方學徒宗奧旨幼無童心至鯢齒識滅神全異凡死長沙潭西逾五里陶侃故居石頭寺門前一帶湘江水呼嗟律師之名兮與湘寺有水閣杜荀鶴霽後登唐興寺水閣詩流而不已云一雨三秋色蕭條古剎間無端登水閣有處似家山白日生新事何人得暫閒將知老僧意未必戀松關又有湘亭孟賓于湘江亭詩云獨宿大中年裏寺樊籠得出事無心寒山夢覺一聲磬霜葉滿林秋正深

宋張栻

題唐興寺湘江亭詩注云有唐大中記及詩刻兵火

後沈潭中宋人又得石刻以爲褚詩案其詞意五代

之作耳

詩云遠山崑崙翠疑煙爛漫桐花二月天踏遍九衢燈火夜歸來月掛海棠前石觚

南曰燕窩明吉府徐才人之第徐氏號親重才人父
敦臨字岳石王府書堂官母趙氏千戶之女今居仁
由義二巷舊轅門也案明史載吉簡王見浚英宗第
七子成化十三年就藩長沙嘉靖六年薨孫定王厚
熉嗣請湘潭商稅益邸租不許徐妃聘封疑當此時
請稅益租蓋爲妃設早禾塘田亦其莊業傳爲吉王
故宮又號徐妃皆俗誤也由義巷北有流水溝何雲
從致命於此溝有小橋故亦云死於流水橋雲從聞
降營各散輕騎驟下大兵奄至楊進喜戰死拱極門
外雲從被禽不屈但拍地嗟惜兩掌皆碎絕粒七日

竟喪其元老僧收尸藁葬康熙三年其孫凱啟函驗
視雙瞳炯然頸生新肉寸許事具張垣所記故知顏
公指爪神理非誣湘人盛推閣部以爲史瞿無其略
也而船山不以受降爲可亦各有見矣唐興寺南有
小水入湘謂之陶公港出太平山南流左得西風嶺
水右得朱圯水屈曲東流合上西塘水水出懷義亭
或謂之黃帝嶺南流得洗硯塘水而合港水入湘西
風懷義二水之間平田萬頃膏腴饒沃謂之十萬礮
微患夏漲傷苗耳西北鄉農車輦相屬肩摩轂擊殆
過齊都俱屈於立馬舍俗改之爲立營市湘鄉步道

第一鋪也若湘漣俱漲自楊港通波朱圯經達兩湖常則從楊港泛漣經落筆渡袁家河屈南流而入于湘落筆名渡亦因褚公袁家河初無水會故俗改爲沿湘河言近漣口也漣口謂之湘河口沿湘河之名差近之矣晉袁喬封湘西侯三傳至於山松俱爲名士豈故國之甘棠邪水經漣水東北至臨湘縣西南東入於湘注曰漣水至衡陽湘西縣界入于湘水于臨湘縣爲西者矣臨湘今長沙湘西後立善化不言湘南者水經時湘南臨湘於漣口分界酈道元据宋圖湘已移南百六十里或已廢罷湘西治地在漣口

東故云臨湘爲西南明不在湘西西南也時臨湘去
漣已遠就經言之方輿紀要遂以今縣地皆漢臨湘
地誤矣漣口先有大橋工作數萬金初下石趾有乞
兒言當移上眾忽其言後竟傾圯近岸路亦苦水齧
邇年乃大集資力改路就平勞費數年僅而後集然
後履坦由庚喁于相和然舊路悉種黍稷十里平沙
試馬春游踈蹶步驟垂楊待渡輕舫移煙有川陸之
勝覽也漣水入湘十里而逕壺山回復成潭卽漁潭
矣南遷錄言有人入潭石穴窺明中有古鼎疑爲禹
沈厥水之器又嘗因競渡沒人一舟舟人皆見髯叟

引至其宮皆雲母流離玉堂荃壁奏技七日仍還故處而取去龍頭至今猶有一舸無頭志靈怪也又北第二潭潭水純清重倍凡水匠製銅鉦必取此水淘之千寶所謂鐔于注水其聲清越者也潭水泓深下見游魚然估舟鱗次殊爲囂襍至於通閭交閭娛舟飲巷津柳江梅隴烟媚水白石觜以下坊市三重工商十萬笙歌砧杵晝夜喧闐湘浦通溝闢爲後湖亦謂之雨湖上爲煙柳隄外多園寺嘉慶時官士文宴每集鳳竹庵卽徽商汪程所建門臨湖脰四山環翠王山長所云市不近喧野無傷寂者矣旁爲習家園

明詹事習經祖宅後爲伎廬嘉慶中買得二女豔慧
雙絕入門女覺夜深赴湖死旦日屍浮轉更韶雅縣
君諡治旌爲童烈合葬湖旁鬻者抵罪迄莫知姓里
石探花題墓爲雙壁冢署坊曰雙壁無瑕一時詩人
盛爲詠贊其前有發源殿銅像出自湖中禱疫有驗
俗於五月迎神舊天符祠陳設鹵簿几筵帷帟均交
廣奇珍蘇杭彩繡新祠恥其弗逮乃出白金布地自
殿出街悉庫平元寶觀者履金而入其時海內繁熙
人無盜心固市廛盛事也稍南卽黃龍巷路通馬坡
塔忠武破賊於此始自塔嶺乘勝長驅及此遇賊猝

不能退因列陣以待賊稍嘗卽退官軍乘之鄉民觀者立山坡呼譟合聲動地賊見大兵無數惶駭棄城忠武所向無前陷於此戰南有茱竹館史孝廉兄弟講學處也楊實先作令六年未能一面咨歎其節時論兩美之兩湖積水則南出唐興北通大埠以泄於湘水然今湖淤澱纔餘彷彿湘水帶郭東流逕萬樓乃屈北流萬樓李湘洲所名包儀甫所建以配壺山爲縣形勢其先有黃花亭儀甫以杜詩改之

杜甫發潭州詩

云夜醉長沙酒曉行湘水春岸花飛送客檣燕語留人賈傅才何有褚公書絕倫名高前後事回首一棺

神

其後王山長郭幼隗觴詠於此亦近伯孔帆園樓

下斷岸隆起有脊儀甫始築石臺楹曰傑靈土復起樓故湘洲取大名之雍正壬子通祀文昌因易名文昌閣西南通文星門也

龍安山東十里曰牛頭之山稠泉出其間而西北流入于青竹之水北流入于靳

青竹水出譚坳北東北流左得北沖毛沖南竹山三水右得石竹義泉一水屈蚌蛤山右得稠泉故稠青泉也嘗因濬浚得古石刻惟存有靈處三字餘不可識北有栲木嶺東流入於青竹青竹水又東右得烏泉左得豹嶺水烏泉出尙書嶺北嶺因李文莊以名

之東爲小金塘張南麓聚族於斯矣自烏泉取山徑
北行谷饒奇石俗名其地爲大石頭也豹嶺之西有
尺江港出林塘彎二源俱引合而入靳水會之處謂
之雙塘彎入靳之處謂之石灘音譌而爲燒湯上有
平橋鴈齒明瀾謂之石靈橋渡橋西通道林甯鄉地
也稍行五里則善化南界宋時湘潭兩鄉之地北有
大目寺嶺嶺水南流東屈碑頭市而入于靳碑頭或
曰龜頭狀石爲名劉賓門言石潤體圓有松鬣梅紫
蟲鳥之形嘗得十二石並作詩誇之又築冠石亭跨
靳有甲寅橋劉氏所建乾隆中四劉俱入翰林園亭

敞麗然僕從驕肆行者輒令下馬步過雖有義倉之
惠亦頗爲論者所蚩也或云地師詭說令於祖塋前
穿池劉氏遂敗市前有節烈坊以旌劉女女名滿姑
父亨基臺灣同知林爽文之亂闔門殉節獨留弱女
陳兵脅之滿姑奪刃自刺故表其閭青竹水逕何家
橋北流得傅仙峰水傅仙不知何代人也爲道士禱
雨有應鄉人祠之峰上乾隆初潘晴皋於江渚得一
石像夢人告曰余傅仙也子登第當祀余故來相託
及成進士卽祠置像峰水西流右得龍潭水龍潭舊
曰龍岵上有許旌陽祠祠內鐵鐘款云宋端平三年

丙申十二月道者周道修置明嘉靖四年蛟出成潭寺鐘遂沒後建龍崖寺鐘銘云古方竹寺也稍北白鹽楊雀二水合流西注青竹逕南谷西而入于靳凡十餘里南谷山名也舊志云遠若屏障近如師伏故得

谷名矣靳水水經注所謂瓦官之水也以爲湘浦則圖未審耳水出湘鄉羅仙岩東流三十餘里至甯鄉麻山靳尚墓前水所由名矣又東百餘里至石靈橋而入縣境右得尺江水又東南廟水又東青竹水稍屈南流得西塘水水出西塘塍西流逕道者山南蓋以周道修自署道者故遂名山北有龍顧山並幽阻

高奇嵐光翠映斬水逕山北東流入善化界右得雲
澤橋水又東之字水自南來注之水出青山傳仙峰
東十里之山也嘉樹不凋雙源並佩西爲之字東則
任陂之字港水北流逕鳳池嶺而入善化西北入斬
二十餘里任陂水出山南鶴嶺東北流五里入善化界左
得三叉塘水右得長塘水長塘水右得竹篙沖水俱
出境東北流入湘任陂亦謂之銀陂鶴嶺南望縣城
甲寅寇至避兵者多登嶺以候燹火傳云嵐有鶴至
所未覩也

又東北五里曰黃峰之山竹步水出焉東流入湘

黃峰山有寶巖寺寺有唐香鑪僧具聰造又有明成
化鐘磬水出山南東流右得尙書嶺水左得青山西
水又左得鶴嶺水南流右得楊梅塘黃龍山二水爲
黃龍壩蓋漢湘南侯黃龍故祠之所在也山水逕高
嶺北亦塔忠武屯兵之地下爲鴨婆窰官軍由此長
驅俄失統將已而馬鈴徐響乃從前至斬馘突陣士
眾歡呼由此兵氣百倍矣竹步水逕嶺東南流右得
太平山水又得調塘雲塘餘水東北流右得麻基塘
水塘卽在萬樓之北竹步水入相當縣城北十五里
也

又東十里曰青山又東南三里曰鶴嶺沙步水出焉南
東流入湘又東南七里曰萬仙之峰其北五里曰石牛
之峰版石水出其南鰲洲下港出其陰皆北流入于湘
其山原皆止于湘瀕

沙步水南流右得草塘昌蒲塘水左得栗山壩綠蔥
塘南塘並南流注之而入沙步水又左得萬仙峰水
東流左得西山塘水又左得銀蓋塘水塘北爲銀壺
塘昔墜銀壺於南得蓋蓋泉脈相通矣銀壺塘東別
有水逕鶴子崖北東流入湘謂之湯家港沙步水入
湘之口去竹步口五里

凡三
十里

版石水出石牛峰南石

狀牛眠蹠角皆具膚理粗若犛毛故以名峰下有三角寺水有三源其中源出陳坤左右二流俱引東行左得湖塘水右得九華菴水兩頭塘水而北流入湘凡二兩頭塘在竹沙二步之間若盛漲則二水通波有若湘浦故曰兩頭塘也石牛峰東稍北有樟樹嶺鵝洲上港出嶺南湖塘北流屈東而入于湘謂之戍寅港里其下港出善化杉坤東流入縣境高坤水北流注之乃合東流而入于湘湘水中有鵝洲故二港指以爲名鵝洲字又作莪其上爲興馬洲馬殷所改名也舊志以爲卽橘洲而不言其證今案水經注曰

湘水又北逕南津城西西對橘洲或作吉字爲南津
州尾水西有橘洲子戌故郭尙存湘水又北左會瓦
官水口是南津在靳口上明矣注上言昭潭無底下
卽南津城以馬王改名言之當時重扼昭山屯兵洲
上西接子戌洲本名吉因爲興馬是則興馬爲南津
洲莪洲爲南津洲尾俱接昭山西通子戌子戌蓋今
探塘渡湘津途必由此渡渡亭題曰誕登商旅因號
爲誕登渡音譌而爲探塘形勢旣符莪洲當爲橘洲
興馬卽南津洲舊本一洲故馬氏唯改一名耳探塘
南有橘潭亦其一證齊己橘洲詩云昨日城樓又夜

醉曉行之例長沙湘潭夜航相續自古已然也縣北止於湘瀕渡湘卽分鄉之限舊縣地矣

正東六十里曰屏風之山其南坳曰梅甘有殘梅之水東流爲醴汜之港是界醴陵爲建甯之墟以北至于長沙爲縣首都

屏風山省城地脈主山也勢盤三縣陵谷阻深昔孫氏與蜀分湘始立建甯及後取荆復置湘西今縣境自湘以東皆故建甯之域善化東地本自縣分亦有建甯故地視水爲界瞭然易知醴汜港又名豐溪出梅甘坳西流右得苦竹坪水乃屈南流右得石子嶺

水南流屈白關陽石水出柞頭塆南流西屈右得七
子塘水俗謂白關爲雙江口合而西流逕獅子山南
又西右得青苔嶺水屈南左得關山港水水出醴陵
西流至分水北入縣境北流入醴汜水西流右得天
堂山水水南流合株田鋪水從株田關東流入于醴
汜西流入湘

五十里

自柞頭至株田凡有五關之名昔

馬氏所以限洪吉之間道也南宋以來斯爲通驛凡
至荊嶺皆自江西道此醴汜之上又有青藍港口水
出白井沖南逕隱道山而西流入湘隱道山林樹幽
青石盤繚曲雖在孔道登陟罕尋信眞隱之遠心矣

又西北十里曰婁仙之嶺株洲水出焉西流入湘

婁仙卽所謂姑婦七人俱白日上昇者也山有二峰別以老少亦如一室之太少矣奇峰疊秀高矗雲霄界連四縣東醴西潭東北瀏陽又北善化上有金輪寺雲縈是宗山脈西行白石水之所出也南爲石子嶺株洲水出于二嶺之間西流右得天臺桐子二水屈鷺絲坪南流復西右得荷塘水左得天堂山水西南流逕株洲市而入于湘

凡十六里

株洲與株田或改作

櫛以株非嘉名櫛爲柔木其實地不饒櫛樹也地爲

建甯故城吳侯孫權所立以防蜀湘南之渡後併湘

西因與建甯夾湘對治水經注曰湘水又北逕建甯縣故城下晉太始中立即此城也云太始者据一統言之自晉宋齊陳並爲封國隋立湘潭乃省併入之地當江湘孔道唐宋游旅取徑衡嶺兵爭之際間道偏屯故文宋瑞居此最久范石湖朱遜翁皆有留題胡邦衡自嶺北還胡氏止而觴之詩贈黎倩亦云在此胡氏居在湘西園亭甚盛或其時湘東亦有別墅今則頗爲荒寂不及朱亭之輻湊也洲亦更無遺迹居民猶以岸土爲洲豈湘流移改乎諺云上洲蘆服下洲瓜今瓜亦不異常產同治初土人郭氏宅旁山

裂甚廣下有甃輒方若城基疑必陳前之遺趾矣白石港自善化至半山坡北入境西流屆太平橋左得半山坡西水合天臺山北水北流入白石水右得善化二水其一至太平橋入縣地其一至馬皇坳入境西流復經善化地西流屆鐵甲塘入縣地至太平橋合南流左得荷塘水荷塘驛塘鋪也港水又南流右得桎木坡水稍西得白馬峰水峰北分水砦砦南水皆南流砦北皆北流岡阜互連自縣城對岸南岸驛達于省城或以爲漢臨湘湘南之界也峰水南流合左二水逕石子山東而入港水港水又西南流入于

湘四十餘里

次東二十里曰琵琶之山其東曰苦株之山苦株北十里曰黃登之山又東北十里爲白馬之山其池曰白馬之塘其水西流達于吳港而入于湘其山東行二十里曰馬皇之坳又西北五里曰金阮之坳又西北三里曰玉屏之峰又西北五里曰湘潭之坳又西南十里至于昭山是臨湘瀨下曰昭潭

琵琶山有仙女祠舊云琵琶仙女自餘諸山皆以仙名山仙同聲仙卽山也中有雲岳風洞順治初又於石甕得三仙女之像因新山寺早禱是依觸石生雲

靈通志氣及夫晴嵐雨黛光景常新西爲和尚嶺以
其童禿名之嶺有二水東南流爲嚴家港入湘又謂
之馬家河矣湘水有洲曰古磯洲或書作故礫其南
岸羅氏之世居也明嘉靖時富人羅瑤識張龍湖於
貧困洲皆官地因龍湖貴勢乃得買焉葬瑤於此湘
岸圓圍桑麻漁火故以洲爲鼓礫礫鼓跗名也又相
傳以爲古家洲言洲屬古姓今族猶在洲旁此不知
山澤不封私爲民產尤爲誤矣洲首又有一水曰黃
獺港東流入湘苦株山東復有一港出管子勘南流
屆新橋合石門水入湘謂之下灣石門二石對立中

徑寬平以南有石門或謂此爲雙石門也苦株山北
有水西北流左得大坵水右得黃登山水而合五里
墩水墩去南岸驛五里驛道之首站舊時駟馬排夫
勞費病民自錢漕浮折兵役罕興百年以來莫知郵
政軍興召募不煩州縣空存驛名而已墩水北流屈
版橋右得二水其北水出和尚嶺西流合南水入墩
水北流屈東合苦株水東流稍北合白馬峰水於大
竹港自此西北流入于湘爲吳家港也凡三十里西岸卽
鷓子巖矣白馬峰水西流右得分水砦水左得黃登
山水其間谿谷糾紛東西背赴山岡起伏分爲二枝

一北一南咫尺千里自分水砦出馬皇坳馬皇卽馬王也蓋楚帥屯兵地過坳遶西得金阮坳二坳水皆西流逕佛子嶺又西右得金阮西水亦西流得湘潭坳水坳俯湘潭又爲東北之界故受縣爲名也坳水南流合金阮西水屈高橋合二坳水西流右得昭山水爲易家彎昭山縣望也截波秀立翠若華跗自涓口發舟便已遙見煙雲接暖百里所瞻或題其陽爲朝霞陰爲暮雲陽有驛鋪陰有巡檢司亦水陸之要津其下爲昭潭水經注所云無底者也永初山水記云周昭王南征沒此故名韓退之以爲楚昭漢水膠

舟事有明證楚王萍實地望或符但上有昭灘名因
馬援山潭之號更在其前昭取顯明義兼標表諺云
湘有招山客子不樂久游昭可名山何須周楚潭因
山號理可無疑至其碧波澄湛上搖絕壁晴光煙靄
臨泛忘歸而激浪驚湍因風噴霧行舟不戒輒復傾
摧若周果南巡危同秦政按之水勢亦未全誣元和
郡國志云隋改湘州爲潭州取昭潭以爲名此之不
然具於前說潭有石穴傳云有十龍牀劉敬叔異苑
云有人覆舟墮甌出於洞庭卽知地穴暗通也唐小
說言元和中高昱處士櫟舟昭潭夜見潭上有二大

芙蓉三女對談云當得食明日遂溺三人翌告老安
求符弟子入潭見三白豬捧符而泣明日有黑氣自
潭面而生須臾烈風迅雷三魚沿流而去及許旌陽
傳亦云誅蛟於此水經注云臨湘縣南有石潭山湘
水逕其西山有石室石牀臨對清流或以爲卽連水
之石潭案其次第卽昭潭也水經注又云湘水又北
逕昭山西山下有旋泉深不可測亦謂之曰湘州潭
二山相承地在株洲之下疑卽一山二名不然無以
擬之山側有譚煥之之墓隧道猶存又有劉太尉故
宅錡罷潭州遂家山下南軒來游猶見池蓮今基地

空傳榛蕪弗翦

張栻過湘潭劉信叔舊居有感詩云北渚留行客東陵憶故侯池蓮半枯

折風葉正颼颼事業留千載英雄去一北平生許國志歲晚詭悠悠

山產筍菌並有毒

不可食惟春深紫蕨以供僧饌山寺宋日昭陽殿宇

宏敞憑闌俛眺湘流如帶近爲寺僧遮以堵牆無復

遠景山北逶迤十里勢若龍盤清谿九曲北流入湘

亦分水之界也易家鬱暮雲司並向背山川飛光映

影雲嵐之狀類表仙靈米元章畫爲山市晴嵐故有

雲霞之日舊乃改朝霞爲昭峽暮雲爲磨雲湘旣無

峽乃爲虛造昭潭下便爲橘洲縣北境盡於洲尾也

東南山之首曰鳳皇山朱亭港水出焉西北流入于湘

鳳皇山在縣東南百七十里衡攸三界周盤百里靈
關玉壘結隅幽阻懸泉奔注分蔭腴阡四徑有交曠
瞻迢遼明末劉芳保黃朝宣鄭斯愛負險結砦久而
不下道光末禁建山寺以防伏寇同治中寇剽朱亭
傷縣丞云起於九龍山與鳳皇岡嶺相連回巒複洞
最爲防遏之要區非官吏所能至矣水出山西西流
過石門重崖若關亦舊戍也山北水北流屈西屈石
陂口來注北流右得竹篙嶺水西北流逕飯籬山宋
時以飯甑爲飯籬此山宋舊名也左得三田沖水又
北得攸縣嚴湖水水自燕子窩入縣地逕明月山北

山有鏡石朗若娥照唐釋齊己與山僧友契曾爲賦

詩

明月峯頭石曾聞學月明別舒長夜彩高照一村耕頗亂無私理徒驚鄙俗情傳聞遭鑿後頑白尙

吟

復別寄詩傳其高致惜僧名泯沒翰偈莫聞

齊己寄明

月山僧詩山稱明月好月出山徧明要上諸峰去無妨半夜行白猿真雪色幽鳥古琴聲吾子居來久應忘我山有靈谷巖龍須灘泉石幽奇具於名勝志牌在城

山水合二小水從山南北流注之俱西流屈黃龍橋入鳳皇山水又左得譚坳北水縣有譚家坳南北相距殆二百里譚氏舊族自宋時居湘東後多散居湘西土著之故姓也又北流右得花沖水水出文家坳西北流合攬車嶺水西流入鳳皇山水又北流屈大

田營源頭水西流注之水出源頭坳西流得羶帽山
水醴陵西界山也前漢立陰山縣於醴攸之間自山
以南故陰山地梁武帝分陰山立湘潭則爲湘潭地
縣名所始也山頂靈泉冬夏不竭下有石洞云是龍
穴每旱禱請輒應山水西流逕大安山北山有譚真
人祠近代道人也以祈雨有應民祀甚謹水屈南流
入於坳水又西北右得上下馬跡水石有馬跡云仙
人騎行所經也又西左得西沖水而合鳳皇山水而
爲朱亭港凡六里朱亭縣丞分司之地昔遜翁經過講
學開場因以名亭遺化猶存弭歌比戶瀕湘山有龍

潭卽主一書院故基今爲龍潭書院道光末縣丞劉如皋首出巨貲規制大備春伯之學翕然復昌未幾軍興子衿不嗣同治中有山盜百餘夜劫丞署事起倉卒沿湘震駭官隸不力勞兵歲餘乃罷遂設鄉兵大治團練又分軍戍守以備萑蒲其地遠通衡攸旁連袁吉歲有馬會市駟鬻贏上駟千金決於一驟商旅猶盛也朱亭港南又有澎陂港其水皆出衡山故不具詳矣港對晚洲湘水屈南更北洲在港上而港轉在南杜子美所謂秀色異狀者也

杜甫次晚洲詩云參錯雲石稠

坡陀風濤壯晚洲適知名秀色頗異狀棹經垂猿把身在度鳥上擺浪散帙妨危沙折花當羈離暫偷悅

羸老反惆悵中原未
解兵吾得終疏放

次東南曰軍山其木多茶其北有銀下爲淦田建甯之
墟其山北行入于醴陵

軍山在縣東南百五十里高秀入雲步起風霆故有
雷園風洞中饒茶茗春采露芽供民家常飲下有銀
阬然元明以來未聞開治有水西流屈歷山之北而
合山南諸水山南水四源并濬屈磨盤山合爲一谿
北流入軍山水歷山蓋以歷水名之水經注陰山縣
有歷水下注泚泚口在今衡山縣南俱屬陰山故借
以爲名舊以爲舜巡所歷去此遠矣軍山水又西右

得長野水又西屈南左得開利寺水寺搆自梁天監
時唐仁卿所造像高九丈閣高一尋有半記云貞觀
十五年重修其後有唐佑官嶺南節度使銀青光祿
大夫廣明中黃巢掠湘唐氏避匿佛中三十餘人人
氣潤銅像目如淚寇酋驚謂佛泣遽拜而出舊傳寺
閣爲神工所造嘗傾欹欲壞一夕霆震自然端整今
柱上刻字不復可辨度以今尺閣高六丈四尺像高
五丈二尺信南朝之匠製矣寺水西流右得九思沖
水左得風箕嶺水而入軍山水稍屈西南九牛嶺水
東流屈北合北塘水注之西北入湘是爲淦田港港

北卽淦田市也許叔重說淦泥也字一作泠又水入
船中爲淦此以名田豈謂湘淺膠舟乎市小民貧商
船不泊軍興摧稅黃廷瓚獨設邏於此更煩經費眾
言無益黃曰擔負繞越所失猥多雖歲損千金猶應
立丰況亦小有所獲卒立分局至今不罷心計之周
故非裁省鐙燭者所及矣港側有琴洲水漲則見灘
子歌云水浸淦田洲昭靈橫船下爲空泠之水候也
淦田港下復有鷓子港故或謂淦田上港鷓子港非
湘岸東地並屬醴陵水經注云湘水又北逕建甯縣
縣旁湘水縣北有空泠峽淦田亦爲建甯故城蓋吳

置湘西後移治今南晉乃復還株田歸有光不知建甯有兩故城輒刪去縣旁六字使若先入縣境乃逕縣城紀昀校本從之斯爲踵謬耳杜超宗之爲令縣有夷蠻蓋亦在鳳皇九龍之地株田未必通蠻洞也

湘潭縣志卷第四

下

山水第四之二

正南界衡山境雷祖之峰其西北二十里曰天馬之山
樊田水出焉而東流入于湘其山多青石是有風穴

天馬山在城西南百四十里或以爲祝融之一峰也
雲嶂外青石嵌內秀晴蒸嵐黛陰含風氣如土囊之
口石工采攻青石積歲成巖近歲諸生單鉉等恐傷
地脈遂禁椎鑿山有李仙祠李仙不知何代人也自

明以來祀爲山主

王岱渡花石望天馬山詩半夜嚴風雪滿船一橫煙障隔如屏寒深

野斷荒雞語雲重峰餘天馬青路人幽巖梅早發地當名嶽氣多靈聞鐘不敢攢眉去爲有溪頭惠遠亭

樊田水出山南東流左得樟石冲水南流右得千家
山水又得兩界橋水橋東卽衡山趙南仲之墓也父
子竝有武功階兼將相而碑闕不存封樹荒落樊田
水又東流稍北左得木山西冲二水東南流入湘凡三
十里

又東七里曰紫菴之山又北東十里曰曉霞之山又北
東十有五里曰五龍之山諸山谿澗東南流爲潭口之
水南入于湘

紫菴山有五峰周亙四十餘里云昔劉舍人學道於
此兄弟三人同時仙去祠前池中有異魚金背銀腹

無鱗有足夜宿樹枝今無此類也山東對曉霞每旭
日升光金光黛色曉霞山亦名饒荀山竹筠鮮美叢
箭甘芳采掘旋生日可三四姜筠軒讀書於此蓋指
竹以爲號也其東北卽黃茅驛永桂之要衝矣舊有
驛丞後設巡檢湖外襟官有五色分司並處脂膏黃
茅卽其一也北爲中路鋪於驛道南北爲中旁有虎
井橋云唐代崔生遇虎化美婦沈皮此井復有白泉
廣輪十畝冬溫可浴夏則冽寒游魚倒影若游空鏡
雲氣蒼蒸恒如炊熟泉分兩口飛光匹練故號白泉
也又北卽五龍山湘涓之間百澗千流四面波散約

有五絡皆於此山左右分背山有大傑寺前明吉王
以僧慧菴高行焚修奏賜香田三頃潭口港水出山
南流右得中路鋪水左得雪花坳古岳峰二水南流
屈鐵頂右得黃茅曉霞二水屈馬公堰蓮花砦水四
派東流來注之又南流入湘謂之潭口蓋昔湘潭衡
山分界之地故指此爲湘潭水口凡五里涓西更有潭
口嶺明此非泛謂水中深潭也其西小市謂之寺門
湘水於此東流

五龍山東南十里曰古岳峰其南五里曰長沙之坳又
東十里曰顏子之嶺又東十里爲淦田之塘其水皆東

南流入于湘其外水北流者入于湘西北流者入于涓

古岳峰者或亦以爲南嶽之一峰巖嶠負天遠臨湘

曲南爲長沙坳唐平蕭銑廢湘潭湘西建甯衡陽此

陽卽故衡山湘鄉湘西三縣地但置長沙衡山二縣此其分界故坳

有長沙之名也坳水東南流屈都石站得左右二水

爲都石港或謂之馬子港南流入湘凡二其西別有

一港入湘出於楊溪鋪謂之連家港連氏所未聞也

豈連道故以姓詆乎坳東有水東流得三望坤水屈

石龍寺右得一水山石龍鱗寺因受號宋廖宋民讀

書寺中亦李半村隱居處也坳水東南流左得蒲桃

沖水右得蓑衣塘水卽故花石戍也杜子美劉文房

經過賦詠其名遂顯今漣瀕花石市盛此戍荒寒但

以名勝迹存謂此爲小花石

杜甫宿花石戍詩云午辭空靈岑夕得花石戍

岸疏開闢水木雜古今樹地蒸南風盛春熱西日暮四序本平分氣候何同互茫茫天造開理亂豈恒數繫舟盤藤輪杖策古樵路罷人不在村野圃泉自注柴扉雖蕪沒農器尙牢固山東殘逆氣吳楚守王度誰能卽君門下令減征賦劉長卿花石潭詩云江楓日搖落轉愛寒潭靜水色淡如空山光復相映人閒流更慢魚戲波難定楚客往來多偏知自鷗性

坳水又東流有水自大嶺

西楊子坳東南流注俱入于湘謂之雙港口通謂之

龍船港也

凡三十里

大嶺東水東南流左得二小水爲桑

石港

凡十五里

又東至淦田塘昔建甯西岸津戍也有脩

塘小水南流入湘

凡八里

自此諸小水皆北流入湘也

長沙坳東北五十里度六坳至于矮坡其北十有五里
日出塘之坳又東北十里曰茶子之山又東北五里曰
天梯之嶺是當湘曲在株洲之西湘屈而西南流以趨
縣城

長沙坳北有湯丸汪家桐子喉頸范閔六坳皆谿水
分流之脊自汪坳西至茶園鋪驛道自此渡渭其東
度范坳西行至于矮坡嶺當淶口正西矣顏子坳東
有上山塘水出而東南流逕譚耶嶺左得成礮水右
得泥沖水而北流爲黃竹港譚耶康熙中攸人也客

作湘南嗜酒甘臥主人命典魚陂漫問魚數輒以長竿橫水羣魚躍過令一一數之諸傭塞隄譚夜驅石自赴缺口旣連有神迹眾稍燒之譚厭而舍去遇牧牛童於橋上請其作術握手掐膚使成印文親取布裹之屬日解卽雷雨其年夏旱童憶其言視之肉印宛然俄而澍雨故建祠祀之鄉人相尊曰耶每有禱請稱仙公或時不應呼耶立效嶺後恒有雙鶴以爲雨驗港水又北流逕神仙橋卽牧童爪印之橋也又北流入于湘凡五十里湘水中有巨灘謂之昭靈灘昔馬氏奏封伏波爲昭靈英烈王灘上故有援祠卽以號

灘南宋末樂雷發題詩時祠尙在然已誤靈爲陵於
後又諱昭陵改昭爲釗石鋒星錯川洪線引商舟經
汎時虞損沒舊設引船晴旗霧鼓每日薄虞淵則征
艫暫檣破曉揚舫鴈行魚貫灘下爲鷓鴣磯再下爲
三門灘水經注所謂建甯縣北有空冷峽驚浪雷奔
濬同三峽謂此三灘也但山非蔽景峽不揚波善長
非人未親經歷今驗江峽平水湘灘夷岸雖白勃同
歌而水陸異險矣每歲霜降輒有美魴賴尾細鱗逆
流而上謂之火燒鰮也黃竹港口下又有一港出毛
塘東北流入湘謂之文家港今水旁文氏猶盛文港

下又有水出湯丸坳逕楊柳沖東流左得螺沖白楊
二水謂之三泉觀又北流右得杉木沖水而北流爲
顏家港東入于湘二十里港口卽三門也或言水中三
石如門或言岸旁山有三石門今以水經注三峽之
言並數三灘爲三門似近之矣傍湘有市悉設碓磴
米穀輦集朝夕播春響荅霜砧尤喧舟聽邇者朱亭
寇鈔沿湘騷動有富室吳氏獨斂市錢萬貫盡去緡
串開門待劫旣妨輦運亦無所發怒委之而去門戶
得全又有龍化池者亦饒於貲龍潭置學引洪設局
皆其所募建然不和眾謂爲盜魁因致縣庭府疑未

決累繼經歲僅乃得釋初化龍貪躁每請箕仙輒問
富貴示以某所有金盈缸掘之果得啓視乃是僧塔
及出獄因往南嶽披剃家產萬金埽地盡矣市有種
果橋橋下港水出雪花塢東流左得鰕子泉右得白
楊沖水北流屈牛六口左得西沖水又得竹霞沖水
其水四源並濬俱東流逕石三門左得二水而南流
注港其港因橋爲名今以源出雪花流兼十二宜爲
雪花水也港口卽空洲梁之空雲城石類縣鐘故得
空名矣侯景之亂陸納陷據湘州營州刺史白零陵
出空靈灘討賊納遣吳藏襲破洪雅退守空雲城明

年降賊是知六朝津成俱扼三灘屯成洲中亦如橘
洲之有南津城也洲北復有一小水入湘其北卽空
靈岸今日觀音厓盤石踞波狀若蹲虎蒼壁嵌空僅
容層構滴霤成泉云療百病近歲重加華飾版刻詩
章然圖巘非崇營居鮮勝蓋林樹刊伐故罕幽奇耳
岸旁津渡爲霞石步取杜詩以爲名也

杜甫次空靈
岸詩云沄沄

逆素浪落落展清眺幸有舟楫遲得盡所歷妙空靈
霞石峻極枯隱奔峭青春猶無私白日亦偏照可使
營吾居終焉託長嘯毒瘴未足憂兵戈滿邊徼嚮其
者留遺恨恥爲達人誦回帆觀賞延佳處領其要
北得倉沙港口水出范坳東流合坳南水又東右得
三角塘水左得閔坳矮坡二水稍北左得大雷壩塘

二水而逕倉頭岸東入于湘

二十五里

倉頭蓋前代轉般

之地今米糧悉萃三門壩塘北有城背沖云昔湘南

故城之背也自此至鑿石凡六小水皆東北流入湘

鑿石故有市集近歲湘水攻岸瀕厓善圯水中洲亦

漸沒杜子美宿處米元章題曰懷杜厓舊志誤厓爲

處則爲不詞頃搗磨厓乃識其字

杜甫宿鑿石浦詩云早宿賓從勞仲

春江山麗飄風過無時舟楫敢不繫回塘淡暮色日

沒眾星嘒缺月殊未生青鐙死分翳窮途多俊異亂

世少恩惠鄙夫亦放蕩草草頻

幸歲斯文憂患餘聖哲垂象繫過厓便見株洲疑前

代洲長或湘西指此以名地也天梯嶺左右有四小

水皆東北注湘湘水屈而西南流謂之上彎下彎自

上彎以下水入湖者有南塘洛步二港餘並西流也
易俗場唐爲洛口蓋於此轉漕至黎陽洛口倉洛步
去洛口十里指洛而名或者渭水昔名各水洛步卽
渭步矣

五龍山之北茶園水出焉北流八十里而入于湖其東
自矮坡北迤于黃藤之塘其西止于金霞之山

茶園水又謂之紫金水俗以爲彎頭港在湖水下彎
之前也水道提綱據驛鋪大名故受茶園之號矣水
出柱塘鋪之西卽五龍山北也北流右得南泉大林
二水屈觀音山東山在通衢舊曰衡山翠竹連雲碧

爲天色上有石馬峰正臨紫蓋五峰霜氣晴藻鏡池
其池盛夏彌寒大旱不涸右有深巖是爲雲谷飛泉
瀑布綫嫋琴潺以近在驛途頗難留賞近值荒歉傳
云山土可食爭取爲餌云觀音慈濟然傷悶滿亦有
死者茶園水於山南右得茅塘二水過鋪左得竹坤
水水出坤北流至石壩合左水而其北復有一水出
白雲峰南南流十餘里與竹坤水相對通波俱東北
流入於茶園水峰能出雲故曰雲峰又北屈楓木坤
左得晏坤水水出坤東北流雙佩二溪右合一小水
又東北屈尖岡左得一水山對雲峰碧如玉筍坤水

又東北逕白雲峰西而北流左得高嶺水而東流入
茶園水又北流榜塘水從東南來注之水出范塲東
東北流逕崑山東崑從日山指事始見玉篇而切丑
減山部復有官字云日欲夜也切爲倉龍崑云日光
照也蓋暫字之別體他書未見其用疑特制山名在
宋齊時山列三峰千霄壁立頂有靈泉傳爲仙井榜
塘水又北於九龍山西右得矮坡水胡石壁舊居九
龍今或掘得甌鼎古器又得甄刻胡穎姓名蓋其墓
物土人以山麓爲古城彎云穎嘗屯兵於此文宋瑞
開府湖南推胡甚至帥潭未幾石壁病終復爲祭文

許其鋒蘊此山亦信國之舊游也梅塘水又西流左
得二水而屈石壁眉岡邈迤雲根星燦土戴崔嵬聯
十餘里黛脊龍盤蒼厓熊立兩水夾流巨石斲削故
叔獻取以自號水口號爲紫金水其西水竹彎三阜
連壘云劉荅海駐兵之地西通洛口劉宏化之世居
也又北右得一小水當金霞山東北入于湘金霞正
對縣城上有奇石每朝陽映翠嵐氣金光形家以爲
文筆矣

次南山之首曰琵琶之山以東至于天馬紫荊曉霞五
龍其西流之水皆入于涓五龍山之北三十里曰尖岡

其北三里曰高嶺其東北十有五里曰飛羊之鋪以至
于湘岸其水皆西北流入于渭

渭水縣內大川也元和郡縣志曰湘潭有渭湖舊唐
書地理志湘潭注云天寶八載移治洛口地在下澗
正當渭口蓋唐名洛水旁有渭湖後以湖名被水耳
渭湖卽今卓江湖水盛則爲湘浦說文引爾雅汝爲
渭又云渭水小流渭可名湖本非專達五代於洛口
置易俗場官今猶有易俗鄉遂號此水爲易俗河以
川爲河南北通語然著之縣書則爲不典茲從明史
仍題渭水也琵琶山亦南嶽一峰衡山志謂之屏障

或云日華水出山北三溪並引北流右得牛軛水又

北入涓爲龍口港龍口小市因以爲名涓水出湘鄉

縣南九峰山至塞口嶺西入縣境十五里凡十五里而屆

龍口又北流得花石水水出天馬山西北五源如爪

東西相湊西北流屆漢城橋右得小水自分水坳西

流逕羅漢山北流注之山有十八峰以比應真之數

也漢城漢湘南城班志所謂衡山在東者漢初立縣

皆取寬平腴地兵爭以後始依山水花石水又西流

逕花石市入涓二十里舊以爲劉文房所經非也花石

在湘瀕此同名耳水質清洌尤宜叔乳來其之製名

冠湖南涓水又北右得芙蓉砦水水南流逕九峰砦

西屈西流右合小水西流入涓爲尹家港十五里涓水

北流逕白龍潭東屈屈鹽步左得銅鞭水水出幡山

嶺五畝成流西流北注而至鹽步入涓幡山嶺西北

有鹽灰坤或以爲地嘗產鹽故名鹽步涓水東北流

右得峽山金塲二水峽山水口西岸卽錦石金塲水

口西岸爲射步未知所以名也涓水稍屈南流而東

北屈碧水彎竹樹回溪曠幽宜隱又北流而屈明港

港水出紫菴山北流右得菱角池水左得九峰芙蓉

二水而屈襖砦又左得三小水右得曉霞山北水屈

桎木橋右得花壩水水南北對流南水自丁冲北水
自鴛鴦井俱當土橋鋪西合而西流注明港水桎木
柔木詩所謂山樞也爾雅有樞莖春作白花鯨如馬
纓木堅忍難長故作橋爲異里俗儒生喜以雅文改
地書爲繼述如天子之作添嗣梁家之改良佳類不
勝書堪爲笑柄鴛鴦井嘗出醴泉其後枯竭鄉人不
識嘉瑞傳云因老嫗酌祝恨其無糟自此泉不復出
港水又逕曠家潭東港不能潭塘字誤耳塘水北流
入港又左得槐彎水而西北流入涓謂之明港口近
人書作吟江江旣不詞吟亦無取涓水北流東屈逕

高司嶺南爲麻姑灘山體粗疏灘流濺急若歲儉兵
荒恒虞伏莽又北流右得郭橋水逕銀塘西北流稍
東右得楊溪步株木港二水屈易俗市東而入于湘
西南山之首曰昌山其竹恒華實

昌山周四十里距縣百六十里積嶂虧天攢峰秀野
夷堅志云山竹結實每石得米五斗香與杭同宋慶
元閒歲歉民資以活嘉慶初竹花復實令疑爲瑞山
又有麀鹿康熙五年獵者獲焉有水出此山及湘鄉
銅梁山之間昔衡陽夏叔直避世湘邵嘗至銅梁倚
樹聽泉有詩志勝山下石龍口雙根虬門一徑蟻穿

懸溜瀉春峒湍激竅匯爲響水潭云昔有銅梁飛落
故以名山非擬蜀山之號也港水東流左得雲霞嶺
水右得錦鰲峰水雲霞嶺衡邵通途也東有東霧山
陳恪勤之墓在焉上有東岑菴恪勤讀書於此山下
卽其先宅薨葬故山方苞爲書 賜碑

陳鵬年東霧山詩云路自

中峰上泉從絕頂分曉窗明海日孤磬落松雲水木
知先德湖山話舊聞桃源欣聚族吾亦事春耕東岑
禪院詩云層巒環積翠寶地開東岑供佛峰成榮談
經石似林廚香窺鳥下鉢淨伏龍吟襍被三年夏山
寒每錦鰲峰上有定海寺僧竹浪誅茅所建竹浪筆
不禁

札豪妙力舉巨鐘常跏坐七日雪深過頂虎來跑雪
出之自云零陵王氏勝國之遺民也二水對流屈石

鼓灣又有曉村水與雲霞水分流並注又東右得石橋礮二水逕范鐸峰北東流入港云當周行逢時范鐸避地來居湘鄉及此均以號峰案劉漢時有劉昌嗣嘗刺相磁二州避亂南遷不仕霸府乃更易姓名隱於湘邵豈卽范耶今湘潭改范爲梵云取法器之像康熙時趙恭毅巡撫偏沅備禮徵諸生趙世迴到府講易趙號鐸峰取此山也峰南天塘坳復有小水東北流入港又東左得環山坳水屈南又東屈狀元橋得廣林橋水狀元湘鄉王容也容字南強宋淳熙時及第第一後官禮侍此蓋其書堂故地耳廣林橋

水出青翠峰南流逕彭何觀二仙所常習靜也東流
逕廣林橋蓋以寺名之橋當通道因以號水又東南
流逕草衣岵岵形如月表裏空明五代周時有蜀僧
居此恒衣草自蔽坐禪跣逾三十年未嘗履地因
號草衣師卽岵建寺宋乾道丁亥張南軒與朱元晦
自石灘將登祝融遇雪宿此留題刻石其先又有張
天覺詩刻今並不存橋水又南流入港二水又屈南
流得霞嶺水而入于涓謂之小南港凡五
十里涓水又東
流經衡山地得桃花港又東逕潭口嶺卽龍口之西
岸矣又北流左得延化港水水出燕子巖留田王氏

之族居也縣中王姓留田爲大留田非佳名或云因
亂得全眾言留點南北恒言以不多爲點今丁口踰
萬其地爲留田塘田兵轉輸設塘處也港水東北流
右合藍下水左合旗山水而東入涓二十里涓水北流
東屈左得古樓彎水水出福海山東流逕辰山南六
周子孫自城徙此今但知辰山周氏近歲左文襄贅
居婦家有檳榔之恨反後富貴更爲美談其水右合
嚴坤水而東南入涓謂之回龍港凡十五里涓水自此東
流屈鹽步而北流也

其東北二十五里曰隱山又北東十里曰望祭之嶺又

東如北十有五里曰暫塘之坳其南有碧泉其東北二十里曰洪山其東北二十里曰金盆之嶺其東十里曰麋子之山是當漣涓之交以臨湘瀕爲易俗之場百穀聚焉

隱山有龍湫舊名龍山唐開元中洞山僧良价與密師訪道至山見溪流菜葉撥草行六七里遇老僧羸形異狀問得何道僧言見兩泥牛鬥而入海尋無消息洞具威儀禮拜僧乃燒屋入山价因居此窮谷幽祕虎豹時來隱山之名當起於此於後胡文定葬於山麓別以山後石岫爲龍王山山下立慈雲寺云龍

女獻花因爲山主雲氣紺黛有類綃縠禱雨奇應故
寺號慈雲也今墓寺陵夷土人或誤以文定爲龍神
鼓歌刑牲亦云靈感有水出山南東流逕流葉橋卽
良价步尋之徑矣橋東有小水自南流注又東左得
白石砦水南流十餘里逕望祭嶺西南屈珂里橋
合九潭水而入隱山水明季寇亂驛道荒榛使者望
祭衡山於此嶺下故曰望祭胡氏云秩祀文定故云
王祭隱山咫尺而祭於七里之外斯所未聞又謂康
侯居山時訪高僧因題珂里靖康之際里無貴族鳴
珂之盛不在深山橋名亦後所加非胡題也巖谷重

深良田歲熟居人罕接世事不入州府同治三年有
人卜居九潭彼中猶稱道光四十四年乃不知縣城
曾爲寇陷桃源之事何遠人間隱山水又東流左得
望祭嶺水又東流逕回水彎東至錦石入渭市南有
瀏陽橋因謂爲瀏陽橋港瀏陽初無取義豈此水爲
留水乎凡四里文定留隱以號山川斯亦可矣渭水過
錦石又得如歸港亦以文定名之儻其一證如歸港
出大水坤東流合暫塘坳水坳東碧泉出自唐代涌
沙成珠狀若倒雨投物皆作翠玉色輿地紀勝所謂
澄碧如染者也泉底有小金蓮花上有奇樹四時恒

蔭胡氏來居其名益顯有書院舊祀三賢近有周姓欲入主胡祠因而致訟胡祠專祀本在隱山此祀

三賢理非父子各舉其契何患無徵若重興書院斯

爲美矣

如歸港水凡十五里

涓水又北流過射步得磨泉水逕

彪家坤卽漢明舊里也涓水東北流過明港而稍西

屈北逕古塘橋蓋昔通衡山之驛道涓水又東流屈

郭橋而東北至易俗市而入于湘易俗市唐嘗建縣

五代時爲推場里俗競傳明武宗微行野宿至今岸

無蠶蚋湘南穀豆咸萃於此乃至下游舟載逆輓來

臻富人建倉輒儲萬石寄屯之息歲至萬金縣境最

大市也

次西南山之首曰青山其東南十有五里曰烏石之峰黃草水出焉而東流至暫塘之北北入于漣其神曰易華民禱是依自暫塘以至金盆之嶺其南水皆入涓其北水皆入漣

青山在城西南百里干霄疊翠縈嶂環青中有石洞祠祀易華云華兵敗保此後死爲神華湘鄉人也爲陳友諒參政保聚湘南不爲明屈一方皆嚴事之青山白石烏石三砦相連皆其舊屯其南北又有營盤珍珠二砦亦華所築青山砦北有水出關冲東流合

葛蒲洞白石砦二水北流出湘鄉界至章木橋入縣境東流右得月山水左得白坵餘水白坵漣瀕大陂也餘水雙渠東南交播入於青山水青山水又東流分爲三派其一東北爲楊泗港其二廝爲雙壩合爲占壩爲炭溝港俱入于漣漣水連道所以氏縣也水經云出連道縣西注云出邵陵縣界今漣水出邵陽東北龍山之麓行四百六十餘里屈烏鰲石而入縣境爲文家灘當今湘鄉城東少北二十里酈注所謂湘鄉城南臨漣水漣水屈逕其縣東而入湘南縣者矣注又曰漣水自湘南縣東流以注勘今川流未改

漣水自炭溝港口迤南逕石潭市北而屈北流石潭
有洞穴石戶龍牀外有石牛或云龍像迴瀾激響若
聞春杵涌竇灑流渚青澄碧嘗有遠人嬰疾遇桑二
子治之云住石潭訪之不得乃見古桑三株正臨渡
口於是禱謝今桑樹尙存也其西青石上有仙人坐
痕數步有一足迹長尺五寸自然瑩印自漢以來燒
石作灰以代白蜃兼充五糞石灰之用縣資巨萬石
潭最爲佳窯價取三倍功力過之歲貨十萬金石潭
灰名聞四境也市西有水出縱木塘西東北入漣漣
水又北流爲箕子灘又北右得屯塘水與雲湖水東

西對注又東流得占米港卽黃草水之分流矣黃草
水出烏石峰之北東流逕班竹塘石天際之故居也
兵亂賦繇石爲強族逃民避役者爭具雞酒書田券
夜送與之以求庇蔭其後天際得禍閭室逃亡三年
人莫至門論者悲其象齒黃草水又東流過珍珠砦
云易華被殺頭飛還此水稍南流屈上壩而得長山
水上壩劉氏當乾隆時與七都王氏並盛王族豪侈
劉有裔名劉固王甥一夜舅博負徑輦甥穀九千石
以償博進劉亦不校也其東方上橋則周環之故居
周氏當明嘉靖時田兼四縣至南京沿道並有館舍

至府不履他阡皆其田土以冤殺佑容盡破其家舊志稱其好義登於列傳鄉民又云環爲斬龍官凡地脈旺者悉令破掘蓋交結甘使故傳是說亦其川谷重深地俗然也東南梔子塘陳滄洲書爲池子頭詩云世宅池頭然今通呼枝音在碧泉之東北乃自古弦歌之地比之三砦文武道殊黃草水又北流左得岳坤水水出留軍山蓋攻砦留軍於此俗云明建文君爲僧留止岳坤又作若坤皆無證義黃草水又北流逕楊柳湖東湖匯四十八泉南有白馬廟夷堅志所載薛令伐杉長蛇示怪禱神斲樹神像寸裂卽此

神也黃草水又北流屈馬頸壩而分爲二西卽占米
港冬水逆流則來歲米貴流通卽稔以此卜年其正
流東迤白鹿坤高嶺大壩二水合流逕九公橋鍾家
山逆注之山有大乘寺松杉四蔭石壁中虛云仙人
所居嘗以服器假人九公蓋仙人名也黃草水又北
流西屈而入于漣漣水又東得兩頭坵水屈姜畝屈
東南流爲落筆渡梅林水東北流注之梅林一作煤
礪舊出石炭道旁三檜蒼柯古幹傳云宋植入漣水
口謂之尋筆港云褚公督潭經過留迹今湘鄉又有
洗筆池蓋按事泝漣也漣水又東至看牛山而南東

入湘水經曰漣水又東北至臨湘縣西南東入于湘
漢時臨湘地至下澧司站與湘南夾湘三國分立湘
西故注云至衡陽湘西縣界入于湘水今則當城西
南十里其東南十里爲涓口也下澧司宋置蓋卽易
俗場官之地當在湘南而下澧站在湘北亦猶南岸
驛在湘北縣城在湘南也今人以站爲司沿稱未審
耳

湘潭縣志卷四下